



FRÄIE MIKRO

Een humanistesche Manifest fir d'Europawalen 2019

04. Abr 2019 - 11:00

Am Kader vun den Europawalen 2019 huet d'Europäesch Humaniste Federatioun een humanistesche Manifest mat 14 Virschléi ausgeschafft. Doranner gëtt een Europa gefuerdert a skizzéiert, dat Fräiheet, Gläichheet, Solidaritéit a Mënschewierd tatsächlech respektéiert. De Bob Reuter vun AHA Lëtzebuerg stellt dëse Manifest vir.

Bob Reuter / cbi*De Bob Reuter ass Tresorier vun AHA*

Ech wëll lech haut dësen humanistesche Manifest virstellen, well ech denken, datt d'EU zwar op der Grondlag vun humanistesche Wäerter a Prinzipie gegrënnt gouf - wéi se am Artikel 2 vum Grënnungstraité festgehale sinn - mee datt et haut, méi wéi jee, gëllt dës Wäerter a Prinzipien héich ze halen an ze verdeeden.

Den Artikel 1 vun der Allgemenger Erklärung vun de Mënscherechter spigelt d'grondleeënd Basis vum Humanismus erëm. "Alle Menschen sind frei und gleich an Würde und Rechten geboren. Sie sind mit Vernunft und Gewissen begabt und sollen einander im Geist der Brüderlichkeit begegnen."

Fir eis Humanistinnen an Humanisten ass d'Allgemeng Erklärung vun de Mënscherechter gläichzäiteg ee moraleschen a politesche Kader wéi eng Quell vun Inspiratioun, well se eis Grondwäerter vu Fräiheet, Gläichheet, Solidaritéit a Mëschewierd ënnermauert.

Grondsaz: Säkularitéit

Fir eis Humanistinnen an Humanisten ass och de Grondsaz vun der Säkularitéit wichteg. Dëse garantéiert d'Trennung tëschen dem Staat an de Glawensgemeinschaften, fir datt all Individuum denken a gleewen dierf, wat hien oder hatt wëll a fir sécher ze stellen, datt all Individuum gläich virum Gesetz ass.

Säkularitéit als Staatsprinzip garantéiert Grondrechter fir jiddereen, ouni Diskriminatioun. An enger Zäit, wou populistesch Stëmme fir Spléckung suergen, ass et méi wichteg wei jee, datt mir den Zesammenhalt an d'Eenheet vun engem villfältegen Europa oprechterhalen.

Wéi eng Wäerter wëlle mir?

Wéinst der wuessender Ongläichheet, den ongeléiste Froe vun der Migratioun, den dréngende Klimaerausforderungen, dem wuessende Populismus an Extremismus, dem offene Rassismus a reliéisem Radikalismus an der Polariséierung vun der Gesellschaft, stellt sech ëmmer méi d'Fro, ob d'EU engersäits hir Wäerter oprechterhale kann a sech andersäits de globalen Erausforderunge stelle kann. Vill fuerderen amplaz kuerzsiichteg national Léisungen.

Als Humanistinnen an Humanisten si mir der Usicht: Et geet net ëm d'Fro no den europäesche Kompetenzen an Zoustännegkeete per se, mee drëms, wéi eis Wäerter als Motor fir eng europäesch Integratioun bestoe kënnen. Dofir gouf am Manifest vun der Europäescher Humaniste Federatioun eng Visioun vun enger méi humaner EU entworfen, déi Léisungen ubitt fir déi wuessend Lück tëschent hire Wäerter an der Politik, déi se verfollegt, ze iwwerwannen. En Europa, dat wierklech op Fräiheet, Gläichheet, Solidaritéit a Mëschewierd baséiert.

Eis 14 Fuerderungen

Dofir misste mer u sech vun eisen zukünftege Verrieder am Europaparlament fuerderen,

1. datt si d'Rechtsstaatlechkeet an d'Demokratie oprechterhalen;
2. datt si d'Zivilgesellschaft als Géigekraaft zu der institutioneller Muecht schätzen a stäerken;
3. datt si d'Visioun vun engem säkularen Europa schützen an ausbauen;
4. datt si d'Gedankefräiheet fir jidderee verdeedegen a besonnesch déi net-gleeweg Léit schützen, an Europa a weltwäit;
5. datt si d'Meenungsfräiheet verdeedegen a besonnesch d'Kriminaliséierung vu Blasphemie oder vun der "Beleedigung vu reliéise Gefiller" ofschaffen;
6. datt si fräi a pluralistesche Medien als Réckgrat vun der Emanzipatioun vun de Biergerinnen a Bierger ugesinn an als solches schützen;
7. datt si d'Wielfräiheet als Grondstee vun der Mëschewierd unerkennen;
8. datt si eng Gesellschaft hëllef gestalten, déi all Mënsche wäertschätzt, wéi si sinn;
9. datt si agesinn, datt et keng Mëschewierd gëtt ouni sozial Gerechtegkeet a Fairness;
10. datt si säkular an ëffentlech Bildung als Bedingung fir Gläichheet unerkennen a schützen;
11. datt si d'wëssenschaftlech Fuerschung an Innovatioun férdere, se virum Afloss vu reliésen Dogmen schützen, ouni d'Konsequenze vun der Technologieuwendung aus den Aen ze verléieren;

12. datt si eng gemeinsam Immigratiounspolitik opbauen, déi baséiert op Solidaritéit a Verantwortung;
13. datt si ee staarkt Europa hëllef gestalten, wat Fridden a Mënscherechter an der ganzer Welt stäerkt a
14. datt si dofir suergen, datt mir solidaresch si mat den zukünftege Generatiounen, andeems mir fir eng nohalteg Entwécklung suergen an hinnen ee liebenswäerte Planéit hannerloossen.

Da wësst Dir jo wéi eng Froen Dir an de nächste Wochen de Kandidatinnen a Kandidate stelle kënn, fir erauszefannen, wat si wëlles hunn ze ënnerhuele fir Europa méi humanistesesch auszeriichten.

Mam Zil, déi ëffentlech Debatt ze fërderen, invitéiert de radio 100,7 am Fräie Mikro Leit aus der Zivilgesellschaft fir aktuell Themen ze kommentéieren. De Fräie Mikro spigelt reng d'Meenung vu sengem Auteur erëm.

An der Mediathéik:

Fräie Mikro / 04. Abr 2019 - 08:50 / Bob Reuter

Lauschteren 